



## 過年

年三十咗！記得在還讀小學該下，這一日打早阿公就吩咐等，今晡日蓋無閒，愛聽話、愛同大人儕搵手，出外打拚个阿叔佢等下晝就會歸來過年咗！

學校一放寒假，阿姆早早就交代過，入年假前，愛先同頭那毛剃好，係無阿英姐會起價；愛同阿婆搵手去磨米，係無阿山伯婆該仔會排毋著磨，嘎就會赴毋掣蒸甜粿、做發粿。講係學校寮寒假，其實這下正係佢等細人仔最「無閒」个時節。

等送過灶君，入年假咗，正式就鼻得著過年个味緒！伙房禾埕角項个大灶，早早就起好火，伯婆、叔婆佢等使等佢等這兜細亞囉，愛記得加樵草同火掌好、搵枋板脆，連烏蠅都愛掌等，就係做毋得亂講話。係嘴亂呷，到時節發粿無閒，無就發著毋好看，嘎就話霸毋好，該下分伯婆佢等賴就有，還係恬恬搵做就好。毋過講實在个，發粿係做著毋得阿婆佢等惜，顛倒係佢等過好个，恁仔在過年前就有好先食粿仔咗！

該恁多日佢同阿婆、阿姆共下，伯公、王爺聚概都愛先敬過。食過夜，大人儕就在禾埕簷哆，講來講去，總係講伙房肚出外打拚个人，麼人毋曾討、哪個毋曾嫁。等佢等歸來，正過再來問莊仔項有恁堵好个對象無？佢看等電視新聞在放送，該兜出外打拚个人在臺北車頭排幾下日个列，就淨為著一張歸來過年个車票。佢等哪知得屋下，大家愁个係佢等个人生大事。

臨暗該下愛敬祖，阿叔、阿姑佢等差毋多也尖車歸到屋下咗！暗晡頭食團圓飯，佢等這兜細甥仔講幾句好話，該砵年錢的紅包總會分佢等暢到喊毋敢。毋過在睡前，阿姆又會交代，該兜錢做毋得亂使，等過核年愛拿來繳學書金。聽著這兜話，恁著祥仔伯个糖仔店裡背个玩具手槍、阿財伯賣个烘灌腸，又毋多使想咗。

毋多使想、毋多使想，時間一下仔就過核幾下十年。時代進步咗！該兜已經係三、四十年前个事，今這下，哪還有人在臺北車頭排列等買車單？手機仔一抹，幾點鐘過後就做得歸到屋下。也毋使使人同自家搵手磨米，發粿、甜粿超級市場買就有，禾埕角項个大灶，早就毋知走哪去咗。過年前，伙房个禾埕就淨伸該幾頭桂花樹，冷寂寂仔同自家樣陣。阿叔佢等討咗姐仔，有自家个家庭，搬出去歇，乜毋會再赴時間歸來過年咗！拚等時間歸來過年个、分人愁等人生大事个，對阿叔、阿姑佢等換做自家个細人仔咗。

有人講年个味緒薄核咗，有人講過年毋像過年咗！社會个進步、生活變得盡好，日仔過得像頭擺過年樣仔，哪會知得年个味緒係仰仔？還有人講，罕得放棄恁多日，將就出國過年，等坐上飛行機，心肚仔正思考，「年」敢有在外國？

今晡日又係年三十咗！講實在个，佢甘願同今這下所有个，拿來交轉還細該下做得分人盡多回憶个過年！

作者：陳志寧

### ☆詞彙學習☆

【細亞囉】se o' lo': 小孩子的暱稱。

【話霸】va ba: 徵兆。

【顛倒】dien' do: 反而。

【簷哆】dam' de': 閒話家常。

【細甥仔】se guai' e': 小孩子的暱稱。

【繳學書金】giau' hog su' gim': 註冊繳費。

【車單】ca' dan': 車票。

【冷寂寂仔】lang' xid' xid' e': 孤單寂寞。

【樣陣】iong ciin: 作伴。